

SJEĆANJA NA PROŠLOST BANJE LUKE

Nije mi poznato porijeklo loze Džinića u Banjoj Luci. Prema nekim verzijama porodica Džinića vñče porijeklo od srednjovjekovne porodice Vragovića, prema drugim od Sokolovića, prema trećim verzijama porodica potiče iz Anadolije itd. U svakom slučaju, porijeklo je ostalo nerazjašnjeno.

Najstariji Džinić za koga porodica zna bio je Salih kapetan Džinić u Bos. Gradišci, odnosno drevnom Berbiru. U gradskom parku Bos. Gradiške nalazi se jedan grob i prema predaji taj je grob njegov. Ne znam kako se porodica granala, ali znam da su se u Banjoj Luci razvile dvije velike grane ove porodice. Što se tiče Džinića u drugim krajevima, naprimjer u Tuzli, nemam nikakvih pouzdanih podataka za tvrdnju da bi mogli biti u krvnom srodstvu, ali ni to nije nemoguće. Osim toga, znam da ima i pravoslavnih Džinića. Jedan mi se Džinić javio iz Vojvodine 1938. godine interesirajući se za porijeklo loze, ali mu nisam mogao ništa pouzdano odgovoriti.

Koliko mi je poznato, veliki zemljišni posjedi Džinića obje banjalučke porodične grane nisu bili strogo podjeljeni, odnosno razgraničeni, a nalazili su se u DEMIROVCU, DRAKSENIĆU, TURJAKU, BISTRICI, LAMOVITOJ, OMARSKOJ, PISKAVICI, ŠIMIĆIMA, VERIĆIMA, KRMINAMA itd.

Moj pradjed bio je Ali beg Džinić. Muški potomci bili su ^MHamded-beg, Ragib-beg i Smail-beg. Od dvije njegove žene Muhamedbeg bio je od jedne, a ostala dvojica od druge. Koliko mi je poznato, Ali-beg Džinić stanovao je na desnoj strani Vrbasa u Banjoj Luci. Muhamedbeg umro je veoma mlad.

Ragib-beg Džinić umro je 1916. godine. Oženio se za djevojku iz porodice Pašića iz Bijeljine. Mislím da je pohađjao samo Ruždiju. U braku je imao više djece: Ali Kjamil beg Džinić, Halid beg, Šakreta (udata za Bakir bega Tuzlića) i Fatima (udata za Ramiz bega Begovića iz Dervente; preselio se u Banju

Luku). Ali Kjamil beg Džinić bio je advokat. Umro je prije nekoliko godina u Zagrebu. Njegova djeca su: Bakir (apotekar, sada u Sarajevu), Ragić (inženjer građevinarstva) i Tahira (ljekar).

Halid beg Džinić umro je prije dvije godine. Završio je Ekonomski fakultet u Zagrebu. Međutim, nije se bavio strukom, već je živio kao rentijer u Banjoj Luci. Oženio se sa Senijom Salihbegović iz Bijeljine. Njegova djeca su Sead (nastavnik Osnovne škole u Trnu) i Nura (koja radi u Preduzeću za izgradnju Banje Luke).

3. juni 1975. godine
Banja Luka

(Džinić dr Asim)